

四庫全書

集部

欽定四庫全書

西山文集卷五十四

宋 真德秀 撰

祝文

諸先賢祠祝文

某昨叨守符慚無善狀茲由閒館被命復來惟公德愛  
在民如古循吏緬懷遺範可效可師朝夕恪恭庶幾萬一

韓忠獻 趙丞相 游御史

前文

改云

惟公以有宋元臣實生此土

前文

改云

惟公以中興元臣實生此土

前文

改云

惟公道盛德尊嘗居元幕

社稷祝文

惟神五行之主百物所生邦之羣祀莫此為重維春之  
戊祇薦吉蠲歲稔民安繫神是賴謹以后土勾龍配

稷神祝文

惟神實生百穀育我羣黎爰以仲春恪修常祀田功方

舉土脉未膏澤洽歲豐願垂嘉應謹以后稷氏配

后土勾龍氏祝文

惟神平易九州功垂萬古其在郡國典祀有常敬共以  
陳豈云故事併祈靈貺膏潤下民

后稷氏祝文

惟神播種百穀粒我烝民配天之功振古無匹恪共修  
祀敢曰故常俾歲大豐於神是望

北山祝文

按祭法凡山林川澤能興雲雨者謂之神有崇北山實應斯典某昔叨假守凡有禱請未嘗不先焉曰雨曰暘殆猶響答今自首春以來雨不時若者幾四旬浹矣田事方興而膏潤未洽某日夜念此如惓如焚惟神屹然尊雄為一州之鎮歎雲泄霧噓吸雷雨直反掌間耳是用修舉舊典以有謁於神願矜其誠亟賜嘉澤使耕稼以時而豐穰可望豈獨邦人道溝壑之厄某亦與被丘山之恩謹告

祠山祝文

昔某之在江左也值王誕彌之日必致敬焉今者再守  
溫陵祇事之初蓋嘗遣官代謁於祠下矣而未果躬造  
也仲春上弦時維陽中毓聖降神實在此日庭訟方殷  
展謁未皇敬以瓣香肅將誠意農方望雨王其念之俾  
清明之前膏澤霑洽于耜舉趾得以及時某當消日以  
拜王之賜其敢不虔謹告

春祈諸廟祝文

古者祈報之禮社稷而已後世徧及於山川百神之祠蓋有功於民固不容畧也惟神廟食茲土亦既有年方春致祈專為農事甲申之夕雷雨作解固足慰三農之望矣自今以往曰雨曰暘必以其時然後豐穰之慶可卜惟神其幸惠之不腆醪羞具將誠意

社稷神祝文

古者諸侯之祭惟社稷而已蓋稷非土無以生民非稷無以農重社稷所以重民某叨恩來守禮當祇謁其敢

弗恪尚惟默相俾大有年

風師祝文

某入郡之初嘗謁于社稷矣而未知風師之有壇也立  
春之後方修祀事而國有卹典不及躬陳闕而以官

僚代之每廩然不自安也謹涓穀旦按視壇壝且庀工  
徒稍加繕修惟神當此春和扇溫厚之仁以成生育之  
化吉蠲之報其敢弗虔謹告

雨師祝文



某入郡之初嘗謁于社稷矣而未知雨師之有壇也茲  
涓穀旦躬修按視之禮且命僚屬稍加繕治惟今農事  
方興而嘉澤未應某竊懼焉願神賜以霖霖繼以優渥  
且霑足焉俾歲大豐而民有生意則吉蠲之報其敢弗  
虔謹告

雷師祝文

某入郡之初嘗謁于社稷矣而未知雷師之有壇也茲  
涓穀旦躬修按視之禮且命僚屬稍加繕治惟今啓蟄

既久而霆聲未發某竊懼焉惟神當此大壯之月誕推  
作解之仁俾百果草木無不奮張而泉源之竇流通衍  
溢耕稼以時迄成豐歲則吉蠲之報其敢弗虔謹告

聖妃宮祝文

某猥以非材再守茲土實惟神芘是依今者凶狡之徒  
方舟南下所至剽奪重為商旅之害某既調兵以逐捕  
矣於惟聖靈丕赫振耀凡航海之人仰恃以為司命是  
用祇遣官僚敬伸忱禱昔者戊寅之役蓋嘗賴神以有

濟今舟師追賊行且相及正仰資聖力之時惟神繫之維之使不得遁王師大捷一網弗遺鯨波晏清如行枕席之上皆神之太惠也某之報謝其敢弗虔謹告

海神祝文

大海之神比者溫明之寇來自北洋所至剽奪重為民旅之害舟師致討稍挫其鋒而餘孽尚蕃也儻弗即撲除則其縱橫海道未有窮已某既大集官民之兵俾往迹捕然鯨波浩渺實為危道非神力助順豈能必濟是

用一誠遙祝且委官僚致少牢之薦以乞靈於大神伏  
惟擠狂寇於立敗之塗導王師以必勝之機使一網盡  
獲庶幾萬舶安行羣生嘉賴某之所以圖報於神者其  
敢弗虔

通遠王 靈著王祝文

前文且委官僚一句

改云

且委邑令致禱於祠下伏惟云

云

社神 稷神 后土 句龍氏 后稷氏 風雨

師 雷神祝文

社稷穀雨之雨閱日幾何高田已乾良苗將瘁是用震懼奔告於神瀕海之邦土脉剛燥一雨十日霈然溢流滲之漉之庶克有濟造化之妙咄嗟可能神其哀恫是拯是救謹告

諸廟祝文

田之甚畏者莫如旱而旱之可畏者尤莫如春蓋播殖之功於是乎始雨不以時則種不得入豈非甚可畏者

乎泉為瀕海之邦厥土剛燥五日不雨則高田告病十日不雨則雖膏腴之壤亦索然矣今自穀雨以至於今霽色彌旬田之告旱宜也某濫尸郡紱無善政以和陰陽致此災沴然罪在守而不在民守誠有罪不敢辭罰若春種弗入一歲之功於是乎已生靈之命將委溝壑是豈明神之所忍哉吁嗟以祈恭俟嘉應謹告

惠安縣管下聖妃宮祈雨祝文

乃者穀雨以來嘉澤弗繼某既徧祈郡望矣雨意屢作

而未即霈然惠邑之士有言龍宮之山聖妃之祠靈響甚著鄉人父老方奉九座真如之像就致禱焉以郡守閔雨之誠僮致辦香為民有請無不獲者是用控露忱辭遙伸懇款且委邑尉代謁於祠下夫以聖妃之神靈而濟以佛菩薩之慈悲其視生靈之急必將如拯焚溺願不惜嘘吸之力使一雨十日高原下隰無不被優渥之施闔郡七邑俱為豐年則某之所以圖報者其曷敢懈謹告

北山神祝文

間者庚申以閔雨有祈於神繼是日登北壙之樓望名  
山而控懇焉荷神之慈賜答如響乙丑之晡霑然而洽  
平疇賴以滋溢良苗為之奮興然謂之霑洽則未也是  
用再詣半山稽首致祈願先小滿而潤澤豐不待芒種  
而播藝畢庶幾一稔可期而民免流莩戴神之德其敢  
弭忘謹告

惠安縣龍宮山聖妃祠等再祈雨祝文



某間者以閔雨修祠遣邑尉代禱祠下而某拜於庭以  
送之鄉之士有馳報者謂祝祠甫至而甘霖隨霈不疾  
而速有如此者某不勝興敬維瀕海之邦厥壤剛燥比  
雖得雨而風日炎燦潤澤易竭種藝猶艱一或失時後  
雖甘霖相續亦無及於事矣十萬生靈之命安危存亡  
決於朝夕豈細故哉是用命邑宰敬致菲儀就屬鄉士  
再伸忱禱伏惟英烈之神靈正覺之慈悲實亟圖之一  
雨十日俾土之瘠者肥而苗之萎者茂環地千里俱為

豐年則某之所以謝靈貺者其敢或後謹告

東順正 西明烈 明德王祝文

城隍之有神州郡之有守幽顯雖不同其食於民則一也夫既食民之食則當憂民之憂此某於今茲之旱所以惶懼怵迫而有求於神也守之憂民如此神之憂民其可已乎然守能憂之而不能救之能憂而又能救者神也今旱勢極矣神於是焉而不救則苗將枯槁以死民既乏食必將飢餓流離以死神其忍之乎夫人與天

未能無間者也。某之愚，猶欲籲天以掇之神，與天本無間。神為有請於天而賜之雨，顧不甚易乎？以神之靈之仁，必能哀憫斯民而思所以掇之者，用敢頓首以請。謹告。

龍湖祝文

龍湖之神，迺者季春以來，雨弗時若，幾於靡神不舉矣。雖蒙響答，纔數刻而止。田疇之槁，猶自若也。謹按圖志：晉邑之南，龍湖在焉。淵渟瑩徹，周數十里，蓋有神物宅。

乎其中湖上有祠靈應夙著某以城鑰之守弗克躬造而命邑尉往致祈焉謹拜於庭遙致忱悃伏願油然而雲興霈然而雨注以震耀龍君之威靈俾歲有秋而人弗告病則某之所以圖報者其曷敢忘謹告

### 龍潭祝文

龍潭之神前同謹按圖志常逮之里龍潭在焉赤虬之異

著自疇昔某以城鑰之守餘同前

### 朋山廟祝文

朋山感寧王前謹按圖志朋山清源實為此土之望天

降時雨則雲氣必起於二山之顛屬茲早暵宜控忱請  
某以城鑰之守弗克躬造而命邑官往焉謹拜於庭遙  
致悃悞伏願油然而雲興霈然而雨注以彰爾神之威  
靈俾歲有秋而人弗告病則某之所以圖報者其曷敢  
忘謹告

紫帽山祝文

紫帽山威靈顯應王前謹按圖志紫帽之山實為此邦

之望而神食其地靈應夙聞屬茲早暎宜控忱請某以

城鎗之守

同前

飛陽廟祝文

飛陽廟顯應王

同前

謹按圖志飛陽之廟靈響夙聞屬茲

早暎宜控忱請某以城鎗之守

同前

同安縣昭應廟祝文

勅封善澤侯神善濟侯神善貺侯神善利侯神善惠侯  
神善祐侯神迺者季春以來雨弗時若幾於靡神不舉

謹按圖志昭應之廟神龍宅焉洞冗深沉杳不可測昔者命書之始至也乘雲拏空衆共覩焉屬茲旱暵宜控忱請某以城鑰之守同前伏願油然而雲興霈然而雨注以彰我龍君之神靈俾歲有秋而人弗告病則某之所以圖報者其曷敢忘謹告

南峯潭祝文

南峯龍潭之神同前謹按圖志南峯有潭神龍宅焉昔在

淳熙有令嘗禱雨於是隨獲甘霖靈響著聞屬茲旱暵

宜控忱請某以城鑰之守同伏願油然而雲興霈然而雨注以將我龍君之神靈俾歲有秋而人弗告病則某之所以圖報者其曷敢忘謹告

### 龍潭祠之神祝文

同前謹按圖志佛嶺有祠下瞰龍潭靈應彰灼屬茲早暵宜控忱請某以城鑰之守同前伏願油然而雲興霈然而

雨注以震耀爾神之威靈俾歲有秋同前

### 石鼓神祠祝文



石鼓神之祠

前同

謹按圖志石鼓之祠靈應彰灼屬茲早

曠宜控忱請某以城鑰之守

前同

白馬仙祠祝文

白馬仙之祠

前同

謹按圖志白馬之祠靈應彰灼屬茲早

曠宜控忱請某以城鑰之守

前同

古潭五龍廟祝文

古潭五龍廟之神

前同

謹按圖志古潭之側故有神祠實

曰五龍靈應彰灼屬茲早曠宜控忱請某以城鑰之守

同前後  
同南峯

龍湖廟祝文

龍湖廟之神

同前

謹按圖志麗碧之山龍湖在焉白雲覆

顛則雨立至屬茲早暵宜控忱請某以城鑰之守

同前

佐溪潭祝文

佐溪潭之神

同前

謹按圖志佐溪之潭石竇深神龍攸

宅屬茲早暵宜控忱請某以城鑰之守

同前

福遠廟祝文

福遠廟諸位龍王乃季春以來雨不時若幾於靡神弗舉矣而旱氣彌烈竊意廟貌之靈有當躬禱而未及者矣考按圖志惟神之居於方為東所主者生於位為辰其象為龍紹興中守臣因旱以請又有變化飛騰之異某昔在嘉定亦嘗致禱而有獲焉昨者僅命官僚而未果親謁此某之罪也是用消日之良頓首庭下顧廟雖有號而封爵未崇願神昭示威靈隨禱立應霈然大雨盡起欲槁之苗轉函為豐活我黎庶則某當顯白於朝

袞服命圭以為神之報茲言弗爽天日實臨謹告

祠山祝文

正佑昭顯威德聖烈王

同前

考按圖志惟王聖德神功被

於遠邇四方郡邑莫不有祠而泉之祠尤閎且麗民之恃王為命也久矣間者僅命官僚而未克親謁此某之辜也是用涓日之良頓首庭下惟王哀憫斯民而亟救之俾無餓莩流離之厄則吏與民均荷王之賜其敢有

志

廣佑廟祝文

明應威信廣佑福善王

同前

惟王嘗守茲土遺愛在人雖

大振厥靈於樵川然惓惓此邦必有不容釋者謹命官

僚

餘同  
祠山

北山神祝文

某自仲春之六日以閔雨有祈於神信宿之間賜答如響及季春以來懇祈者再而賜答乃若少緩焉然所謂當小滿而潤澤豐未芒種而播藝畢則亦未嘗不如所

禱也荷神之休拯此民命謹再拜以謝且將相攸吉壤以麗壇壝之奉焉惟神益彰厥靈俾梅雨時至載優載渥載沾載足使高原下隰無不稔之田則某之所以敬事神者其曷敢有已謹告

社稷四位 三城隍謝雨祝文

間者以早暵有禱於神越翼日遂雨又彌旬而雨大摯遂告足焉種藝之事得以及時是用俯伏壇壝以謝神之貺惟閩之俗以梅雨多寡而占歲之豐儉願神哀矜

卷五十四  
斯人而幸賜之俾芃芃之苗賴以蔭養方苞穎粟迄於  
有成神之惠也民之福也某之大幸也其曷敢忘報謹  
告

諸廟謝雨祝文

比以早暵有禱於神曾未逾旬雨遂告足種藝之事得  
以及時是用祇遣掾屬敬伸謁謝之禮梅黃而雨茲惟  
厥時願神之仁錫以終惠俾大田之稼迄獲有秋報事  
有常其敢不恪謹告

祠山 廣佑王 福遠廟謝雨祝文

間者以早暵有禱於王是夕之雨霖霖達旦又彌旬而  
雨大摯遂告足焉神之惠也民之福也封爵之請其敢  
或渝

外縣諸廟 龍潭祝文

比以早暵有禱於神

下同諸廟祝文

祈風祝文

惟泉為州所恃以足公私之用者蓄舶也舶之至時與



不時者風也而能使風之從律而不愆者神也是以國  
有典祀俾守土之臣一歲而再禱焉嗚呼郡計之殫至  
此極矣民力之耗亦既甚矣引領南望日需其至以寬  
倒垂之急者唯此而已神其大彰厥靈俾波濤晏清舳  
艫安行順風揚颿一日千里畢至而無梗焉是則吏與  
民之大願也謹頓首以請

聖妃祝文

天下之至險者莫如海道而至不仁者莫如盜賊以至

不仁之徒而憑至險之地其為生靈之害可勝計哉其  
再忝郡符方將與民相安於無事而自春徂夏寇至再  
焉前者自北而南僅能小挫其鋒今復自南而北儻不  
大懲艾之則方來之患未有窮已是用糾合熊虎之旅  
俾往殄鯨鯢之羣惟聖妃神靈烜赫凡航海之人賴以  
為司命是用有詔焉導王師以必勝之機而擠狂寇於  
必敗之塗如前日之所禱者非聖妃其誰望敢俯伏以

請謹告

社稷神 風雨雷師 城隍諸廟祈雨祝文

六月之雨春秋書之於冊蓋喜之也以六月之雨為可喜則其不雨之可憂明矣比自甲寅以來雨之弗繼者兼旬於此芄芄之苗無以膏潤其憂顧不大矣乎既以籲於天又將懇於神而洞酌未伸嘉澤已霈蓋為之喜而不寐明發夙興敬拜於壇壝之下為民而謝且為民而禱焉浙玉炊薌數日以俟惟神終此大惠俾吾民均遂一飽之樂豈不休哉謹告

社稷神 風雨雷師 城隍諸廟祝文

春秋之交雨以時至此豐年之祥也然適中則為美過度則為災矧早稼在田刈獲方興而霖淫弗止豈不妨良農之功而損嘉穀之實乎是用祇命官僚赴愬於神伏惟賜以兼旬之霽使畢收成之事而後錫以嘉澤焉其之望也邦人之幸也敢頓首以請謹告

北山神祈晴祝文

昔者稻方播而雨不時屢以愬於神神不以為瀆而賜

之雨矣今者稻方收而雨過度舍神其誰愬乎是用冒霖淫而陟嵯峨為民有禱焉惟北山之靈開闔陰陽卷舒雲雨直嘔吸間爾伏惟察其為民之誠而即賜之霽非惟大田免淪沒之患而斯民亦逭昏墊之虞荷神之施豈有涯哉俯伏以請謹告

社稷神 風雨雷師 城隍諸廟祈晴祝文

迺者陰霖不止岌岌乎害稼之憂賴神之靈隨禱而霽是神有大造於斯人也繼自今願終其賜焉訖處暑而

晴入白露而雨晴不過於亢雨弗至於淫則大有之年  
指日可待若時秋報其敢不虔謹告

北山神祝文

間者禱霽於神遙蒙響應今茲又闕雨矣捨神其安懇  
乎片雲鬱興霈澤千里神之所易易者敢頓首以請謹  
告

秋賽諸廟祝文

歲事告登民獲一飽嘿回造化繫神之功報祝以時不

敢不恪尚，靳全護俾，成厥終。

慈濟廟祝文

自春以來，民鮮疾癘，導穌去沴，繫神之功。

下同  
諸廟

惠安成應寧濟廟祝文

惟神正直，聰明默佑，一邑聖朝，嘉獎申錫，贊書威靈，益  
章遐邇，蒙福某假守於此，密藉神庥，敢薦菲儀，具昭誠  
意。

謁姜相公墓祝文

嗚呼建中貞元之相垂二十人而以清名直道標表百代者公與陸宣公而已公謫於泉陸謫於忠皆不果召而沒天豈無意於忠臣乎何其厄窮至是也嗟夫靈均弗遷瓌辭孰傳曲江既死勁節愈偉是則天之厄公也乃所以榮公也歟巍巍姜公嶢嶢東峰峰以姜名千古並崇我再來思而再謁公酌以一卮懷哉清風

倪尚書祠堂安奉祝文

嗚呼維此桐城實公桐鄉民奉嘗之沒世弗忘畢方何



知乃煽其毒曾是仁人而不遺以數楹之屋鞠為廢壞  
過者嘖呻迨其既復小大欣欣蓋可燔者屋而不可燔  
者斯民愛公之心歷吉妥靈官僚儼列式瞻德容共挹  
馨烈追惟平生猥辱深知而公於心粗察其微蓋嘗竊  
謂其清如水而澄之不已其直如矢而端之不止昔者  
范公以頌溫國吁嗟惟公有此二德德如溫公而不大  
施施之此邦九牛一毫棟宇告新薌火載設為民者如  
復奉其教條為士者當有以師其風節我行天下落落

少同顧獨仰公屹如山崇蓋不惟懷子產之愛且深慕  
汲直之忠舉觴慨然為三太息百歲之後儻或有知尚  
願配秋菊寒泉之食尚饗

北山祝文

北山之神間者仲春之辛巳以閔雨有禱於神壬午遂  
雨而雷亦發聲自是之後連日皆雨而丁亥之旦迅雷  
驟雨尤極霧沛辛卯又雨丙申以至戊戌如丁亥焉至  
是而一犂始足霽色逾旬農方跂望穀雨之旦又如丙

申嗚呼非吾北山之靈大芑茲土顧何以獲茲敬卜休  
澣之辰再拜以謝繼今有望於神者非一日神之始終  
芑民者亦嘗如一日焉是則某區區之願也謹告

又

詩以龜蒙為魯邦所瞻惟時泉山亦此方之龜蒙也某  
兩叨假守每有旱溢輒禱於神無不響答前後四年歲比  
告豐是神有功於民且有造於某也壇壝將新而某遂  
去惜不睹其成即日登涂回瞻巍巍不忘起敬出為雲

雨潤澤千里俾歲以屢熟某尚有望焉

福州謁先聖祝文

惟孔門高弟若由之果求之藝聖師固嘗許之以從政  
矣而求之所願者方六七十如五六十而已由以千  
乘自許則夫子哂之蓋地廣則難治也民衆則難安也  
自子路之賢猶未易勝此況於一介之末學而遽叨一  
道七八州之寄豈不甚可懼哉惟脩己以敬之一言乃  
先聖示人之要指某也其敢不朝夕恪共以期無負於

大訓有臨在上其曷敢渝

謁先賢堂祝文

惟閩遠在南服而詩書文物之盛軼於中州者以有牧  
守為之作興鄉賢為之表倡故也茲堂所祠為位十有  
八或以符竹或以粉榆要皆有功於士類者也其間經  
術之淵邃德行之超卓名節之巍峩者尤使人瞻慕而  
起敬焉某叨恩來守緬懷前哲釋菜訖事祇謁於庭高  
山仰止庶幾萬一

濂溪 明道 伊川三先生祝文

濂溪先生周元公明道先生程純公伊川先生程正公  
惟三先生之道實嗣鄒魯不傳之統凡今學者知尊經  
術知慕聖賢知天理人欲之分知吾道異端之辨其功  
有自來矣某叨恩來守敢祇謁於祠庭高山仰止凜然  
興敬

晦翁先生祝文

晦翁先生朱文公比歲以來先生之祠徧於宇內某塵

符所至必敬謁焉假守三山實忝師帥之責方將推崇先生之道以興起士風而采諸衆言以為勉齋黃公續承師訓以淑其徒當侑食焉消辰奉安不敢不告

勉齋祝文

勉齋先生黃公惟公之在考亭猶顏魯之在洙泗發幽闡微既有補於學者繼志嗣事又有功於師門采諸衆言奉以侑食英靈未泯必樂於斯

諸廟祝文

恭惟明天子躬攬大柄誕降詔書一洗積年貪濁之弊  
選用牧守分涖庶邦而某不材首叨親擢付以全閩當  
端平之元始和之令肇領厥事其敢不朝夕兢兢精白  
一心無負選任之意然正身以率下節用以愛人在某  
所當自勉若夫時雨暘弭菑沴則惟明神是賴非不肖  
所能及焉是用祇謁於廟庭控此忱禱惟神其幸惠察  
之

南臺廟祝文



惟王之功德顯於漢而嗣立於唐凡閩之人尸祝而社稷之者某皆守泉山猶展敬庭下以乞靈於王況今叨鎮於此覆護而扶持之將惟王是賴用不敢委諸僚屬而必親拜謁焉今之所祈王者大畧有二旱溢頻年人匱於食徠千艘而平市估時甘雨而兆豐年此其一也江右之盜未平而泉建之師遠戍戎功早捷而振旅以歸此其二也若夫區區一心所欲為鄉鄙之民興悠長之利者亦惟王有以相之使志得以行而事得以宜使

後之人曰以閩人為閩師而不孤閩人之望者某也是  
王不獨有大惠於某而且有大造於閩豈不休哉敢再  
拜以請

東嶽祝文

古者諸侯祭其境內之山川而已魏魏岱宗峙在東夏  
而今之郡國莫不致祠母乃與古異乎蓋其位在東其  
德為仁所以佐天地之發育者也覆冒羣生其功大矣  
故雖不在封域亦得祀焉閩山有祠靈響夙著臣奉詔

作牧敬謁於庭布宣上恩臣之責也若夫時雨暘弭藹  
惠使一道元元各有生生之樂則惟帝是賴非臣所能  
及也用敢再拜以請

炳靈王祝文

惟王佐岱宗以茫茫夏猶六子佐天地以生萬物也某  
既朝於帝因以謁王願推仁恩均被一道則區區之至  
焉

諸處祈晴祝文

維南山之詩有曰既優既渥既霑既足生我百穀蓋雨  
之生物也惟足是求既足而過多焉適足以為物之病  
此某之所以危懼怵迫而有祈於神王也夫苗方穉而  
窘於寒麥將實而病於隰皆至切之憂願神王之仁以  
一嘔吸之力拯而救之開麗象之清明掃積陰之沈滯  
俾穉者以長而實者以成某與斯民戴神王之恩其何  
有極

春祈慈濟廟祝文

惟神之與春祈自某焉始今茲再叨假守思所以為民  
蠲除苛瘞匪神疇依是用以不腆穀蔬將此誠意自春  
徂秋寒暑風雨晦明或過其度則疾癘生焉惟神哀痛  
斯民有以潛弭於未病之先俾皆躋於仁壽之域則其  
有功於生靈大矣某之所以圖報者其曷敢忘

辭先聖廟祝文

某仰惟先聖嘗言朞月而已可也三年有成夫以神聖  
功化之妙猶必遲之三年之久况某之未學乎故自蒞

事以來孜孜汲汲日惟民隱是求嘗白於朝願久其任  
而上恩錫召弗容固辭凡所欲為一一有媿初心多矣  
然洙泗格言則佩服惟謹既不獲盡施以及民則當恪  
守以事君勿欺而犯其敢不勉

辭濂溪先生以下祝文

某自少伏讀諸先生之書亦欲見之行事三山鄉部也  
方朝夕區區勤求民瘼如理家事未能毫髮及人而以  
予環去矣然諸先生所以教人事君者甚備謹當佩服

不敢弭忘願畢此身不渝素節

焚黃祝文

某月日某謹以清酌庶饌之奠并贈告二軸使弟某昭告於先考某人之墓曰嗟維先君無何蚤世積善之慶其延後人肆某不才兩塵科目遂玷朝行歲在己巳夫子有事於明堂某以攝太常卿立樂垂下越歲壬申天子有事於南郊某以攝吏部侍郎奉匏爵六年之間兩遇大慶既叨膺之賜又推恩以及其親於是我之先君

始贈為承奉郎再贈為宣教郎漏泉之澤光賁存歿豈  
曰小子實能之蓋我先君種德獲報之明驗也自頃以  
來屢祈郡紱冀獲一酬墳土躬展燎黃之儀既未賜俞  
且叨柱史之擢久稽祭告晨夕歎然南望松楸心如飛  
旆謹令某代伸敬於墓下明靈未泯尚鑒右之

又

維嘉定十年歲次丁丑三月戊寅朔二十三日庚子嗣  
子具位謹以清酌庶羞之奠昭告於先考奉議府君墓



前日者天子有事於合宮祭澤之頒覃及中外某以將  
漕陪部弗獲與駿奔走之列而湛恩下逮不以疎逖而  
獨遺肆我先君由通籍而有陞朝之贈所以發潛德之  
光而為敬忠之勸也被命南泉遂有過家上冢之幸謹  
以詔黃燎於隧道惟明不泯膺受命祉蓋蕃衍其慶以  
庇於後之人謹告

又

年月日具位敢昭告於先考二十五朝奉之墓者歲在

戊寅聖天子有事於明堂湛恩敷錫我先考實有朝奉  
郎之賜今五載矣迨今乃始獲燎黃於墓下併修拜掃  
之禮焉惟靈益垂庇佑使我後人浸以光顯則告策之  
恩將極其寵榮而後已追想慈範不勝愴然謹以清酌  
庶羞恭伸薦享

家祭祝文

仲夏之祭以日至禮也某以趨名之迫不獲已先期而  
舉焉且因展告而辭之禮伏惟尊靈陰相此行俾上有

益於國而下不辱其身則某之幸

告先考妣加封祝文

某比者國有禋祀覃慶萬方我先考自郎位進三等而為大夫先妣亦有碩人之命其品數益崇而寵光益盛矣迫於名旨未克燎黃於墓下始即家廟而致告焉伏惟尊靈膺此愍冊益昌厥後以迓無疆之休謹告

崇興祝文

嗣皇帝御極覃慶多方我先室由其宜家之名進令善

之號可謂美矣惜其早同於艱難不及生被榮寵此告  
命之詞所以嘆其窮達之不一也茲叨召擢入造從班  
告謁來歸用燎黃於墓下伏祗膺新渥益佑於後之人  
褒封之典方偕來而未已敬陳菲奠少寓厥誠

西山文集卷五十四

欽定四庫全書

西山文集卷五十五

宋 真德秀 撰

祭文

祭趙制置文

故制置端明尚書趙公之靈惟公剛毅之資清修之節  
堂堂山立為世偉人卧護荆襄追迹羊陸獨當一面迨  
逾十年如虎在山如熊當道敵人遠遁邊塵弗驚近世

儒帥殆鮮其匹宜陞樞筦遂督戎師星隕中營聞者驚  
嘆鷹揚牧野弗究厥成某之於公欽仰惟舊茲來假守  
實在寓鄉緬懷英風遽隔泉壤載陳薄奠慨然於懷

祭譙大卿文

嗚呼維乾之元實始萬物化育流行終始惟一存而在  
人則謂之仁心發之於政則謂之仁術上而有國有家  
所以維天命於延洪下而有民有社所以遂羣生於寧  
密未有不由此焉出者何歟譙公世之德人溫溫其容

則惠風愛日抑抑其儀則威鳳祥麟作牧於江民瘼以  
蘇按刑於浙縲囚以虛歲行在亥旱魃為孽大江之東  
蓄患尤烈維我與公並將使指戮力一心拯民於死公  
尤切切終食靡遑攬之溝壑寘之康莊聿來吾閩亦師  
是道飫饑藥羸醒暘滋槁侈養為娛膺任所同獨安澹  
泊殺羞靡豐燕游相夸薄俗所尚獨劬其躬不少怠放  
持牒在廷紛綸旁午康色使前若語兒女公之庇民如  
視其身民之安公如怙其親疾既瀕危猶勉自力朝牘



方披暮簞已易仁哉譙公死不忘民世非無人誰有是  
心為政一年未究設施閩人思公則無窮期嗚呼哀哉  
昔公之來弔我倚廬今我來思哭公喪車酬此一觴千  
古之訣悠悠寒雲相我愁絕嗚呼哀哉

祭慶元張知縣墓文

惟公英邁之姿嶷乎其山立潔白之操凜乎其淵澄發  
之於文則粹然義理之正施諸有政則藹然豈弟之稱  
柰何進不獲踐清華之廡仕退不獲享耆艾之修齡豈

福善禍淫之訓有時而不可必抑天之與人或殊其好惡之情嗚呼哀哉某之與君情深義厚而追莫之行不得執其紼臨穴之際不得以撫其匱此所以慊焉於中而不勝自咎也雨露既濡愴然懷舊何以薦誠唯此卮酒雖欲見君掀然捧腹一笑舉白而不可復得從想像其平生有哀涕其如溜嗚呼哀哉

祭蕭穎仲文

嗚呼我之女弟實歸于君三十年間親好是篤我仕

闕

達女弟遽亡我懷之悲迄今未已猶喜君在庶慰予心  
云胡不留奄復颺逝追念疇昔黯然魂驚一罇陳前有  
涕如瀉嗚呼哀哉

祭葉夫人文

故闕國夫人葉氏靈筵嗚呼人生誰獨無親全美備福  
莫如夫人手教其子蚤魁斯文入從出藩蔚乎名臣距  
美聞孫一枝重春森其拜後雜還芳芬居中歷外輕軒  
重茵歲時歸來宴其親姻燿如金母髮鶴齡椿綠衣爛

斑垂東國鈞肩輿內朝儀形妃嬪倏焉委蛻厥恙何因  
卷我霖雨為淚雰雰訃告之聞疇不酸辛緘辭往奠尚  
鑒忱恂

祭楊宮幹文

嗚呼昔歸自泉公逝於途及歸自洪公弔於廬今茲來  
歸親故滿目問公何在埋玉幽谷七十之年從古所稀  
况又過之公其何悲死於布衣虛度此生木簡綠裳公  
歸何榮紛紛鄙夫惟利是計一錢之捐如割肌體顧瞻

通衢昔跌而傾今實為誰猶砥之平視粟如沙視金如

土迄成

闕

功繫盛德故貪

闕

怛化其孰不然公於將亡

有琅語言割田分貨以收出子家事井然孀恚有紀我  
之於公遊從有年公亡我歸能不慨然有馨斯有有清  
伊醕魂兮歸來尚克我顧嗚呼哀哉

祭果州李郎中文

維年月朔日具位某謹以清酌之奠致祭於故果州使  
君兵部李君貫之之靈嗚呼哀哉仲冬辛卯晨興徬徨

覺中情之弗怡若冰炭之堆腸粵有趙子之書來從九江發而視之則吾貫之使君之訃也輟予食而驚嗟沾予襟而淋浪胡斯世之不幸而若人之云亡嗚呼哀哉君之天資清明純粹君之學問深潛篤至氣夷且溫而毅然有難犯之色行峻且方泊然亡近名之累皆在芸省交情最親及使江東同心拯民我或君違君弗以為忤君雖我從我豈以為恩君舟西旋我旆南下相與夜宿金山之上江濤轟厖風鐸震撼偉勁論之英發旁森

羅乎鬼神至於天理人欲消長之機吾道異端正邪之辨嚴毫釐之剖析極涇渭之區分方且自視歔然念窮格之未精舉措之多戾期舍舊而圖新蓋其用志之剛進德之勇俛焉孳孳而弗自己者直欲古人之與鄰嗚呼哀哉以君之忠誠鯁亮使見用於時而居正君澤物之地則上將有補於主德下將有功於生人借獲不用猶當著書立言闡幽揚遠遠以邈西洛之淵源近以續紫陽之緒業尚有光於斯文亦孰知二者之不一遂乎

徒齋志而沉淪嗚呼哀哉薰蕕不並枘鑿難入豈今獨  
然繇古一律當衆口斷斷之餘其與君者甚寡而予獨  
以為可恃者繫蒼旻與白日又孰知天理之靡常亦若  
人情之難必嗚呼哀哉澹乎無欲君性實然至若食太  
微而學太苦則某嘗以為言乃者黿背之遊深衣大帶  
形臞而神秀超然山澤之仙而其飲不濡唇飯不盈掬  
意者咀道德之華悅義理之藜復何慕乎膺羶慘別幾  
時凶問尋至豈他疾之為祟乎將以斯而損年君於死



生幽明之故妖壽不貳之理講之素矣獨齋咨而弗置者為清時而惓惓嗚呼哀哉君今已矣某之罷駑亡復警策之望矣唯夫平生之言垂別之贈所以丁寧教我者敢不佩服而周旋西望隆山眇在天末欲拊觀一哀而不可得空賈涕其如泉嗚呼哀哉尚饗

祭趙經略文

謹以清酌之奠致祭于某官之靈嗚呼哀哉惟忠定公為國元臣如旦在周如摯在殷君之為子伊陟伯禽謂

宜詔格天之功嗣建侯之寵扶尊安於廟祏垂光燿於  
琳珉而乃官止選曹郎位裁桂林伯彼蒼者天其難知  
耶何以俾忠臣之有後其可恃耶抑何遽奪於斯人嗚  
呼哀哉君之修身義以為質端直自持襮裏惟一其嫉  
惡若仇其與善若昵其遠利若濇其辟寵若疾思昔從  
游於羣玉之上春容於杯酒之間開口論心抵掌劇談  
凡所以發予之衷而作予之懦者真益友之言距今十  
年而君偉然之正論毅然之勁氣猶若鏗乎其在耳凜

乎其在顏也辛未之夏君守濫城載酒江潁以祖其行  
顧瞻同僚莫非俊英若仲章若貫之與吾履常父尤磊  
落而崢嶸然當是時曾未知其可樂也歲月幾何而三  
君子者相尋而皆逝遂掩恨於泉扃然後知若人之不  
易有此樂之不再得前世之士是以當懼而感慨惜別  
而傷情嗚呼哀哉自我來南

清修玉立

泥滓於惟德門

闕

比昆帝遂締姻盟以永百世君寓於

越我家

闕

興相

闕

幾何

闕

之程謂當異時千里命駕

何悟一朝君遽於舍善人云亡吾黨益孤我懷之悲豈  
為私乎聞君之喪邈在海隅往奠一觴聲與淚俱嗚呼  
哀哉尚饗

祭倪尚書文

維年歲六月戊寅朔二十九日丙午持服真某謹頌人  
以薌茗之奠致告於歿故寶學尚書倪公先生之靈嗚  
呼闕流西來盟泊萬里孰櫻其真柱中恃雪壓風催凡  
卉一空惟柏蒼然不改厥容闕  
世之哲出

入三朝壯老一闕政在私門掉臂莫從追時更化亦弗

苟同瑣闕

昌言闕

曾未幾時諫書盈篋亦既弗

闕

懷而歸漣娑丘林以燕以嬉世涂紛夸生闕權利

有鴻冥冥孤入雲際我觀先朝惟清獻闕

畧

與同南臺嘉謬西土遺愛晚闕

惠公

在朝廷懇懇正君公在藩闕

既賦歸塵滓

萬物靜融天光幽闕

所玩心且其超

然得喪莫闕

鄙有書在奩有誨公誨在耳

我闕

還公弔以書其辭辛酸聞公是闕

憂而我焉恤嗚呼此意其曷可忘訃書

踵來痛攪我腸我親之生歲直于卯公年實同歿亦先  
後哭親之淚轉而哭公豈私是懷惟國之闕汲直弗存  
孰讐姦宄揚公遽奪孰洗貪侈謂天孔仁胡正是仇北  
望潛然莫知我憂嗚呼哀哉尚饗

祭倪通守文

維年歲月日闕

真某謹專人以香茶清酌之闕

榮通守大夫倪君靈嗚呼

闕

府我實何能賴子云補

闕

利害之

闕

權其長短語無

闕

子之心相期者遠我麾南下

闕

以書奚其治泉文昌之仁民曰

闕

我以故書來媿媿本末具陳

闕

母崇燕

闕

母豔琛貨民以

闕

雖不敏

闕

蹈茲言免我于郵

闕

行子在劔浦載酒客亭促膝

闕

東歸子趨唁我憂行色辭

闕

節其抑母或過瘁既別

闕

之愛子

疇復

闕

倫梁壞山頽

闕

隨以訃

告我聞驚嘆隕涕失聲胡為德門大禍是并豈推傷致  
此彫耗昔嘗戒予顧復自蹈嗚呼哀哉歲在龍蛇賢人  
所嗟昔疑其誕今果然耶堂堂文昌天既奪之有子而  
材復天閼之巖巖蒼官風雨拔之猗猗碧桐霜雪折之



子榮已矣無復見期往酌一觴大抒我悲嗚呼哀哉尚  
饗

祭劉房州文

闕

故官使知府大夫劉公之靈嗚呼忠肅

闕

之學貫於天人爰暨順寧

闕

書可想芳烈我自少小即聞

闕

始誠公環堵蕭然不蔽風雨

闕

溢宇二頃之田僅給粥饘歎歌

闕

利溺人世所汲汲一罇可投

闕

清淚橫空豈以區區為子

闕

之子展也如是公肖是似

闕

期天胡忍予而遽奪之書來

闕

奏功已屬斯續嗚呼已矣

闕

其我規者有醴斯馨有

闕

慟之悲

闕

古之

訣

闕

祭諫議龍其公國正文

新天子有事於合宮推恩宇內凡忠臣義士之名蹟顯著者俾長史二千石致祠焉所以風勸臣節也惟公昌言直道照映青史馬鬣之封近在城隅曰忠與義疇出公右是用躬致天子之命於墓下而不敢諉之有司焉嗚呼公之南遷坐論蔡氏也方公持扇乞錢之日實彼秉鈞顓國之時榮悴殊塗亦既甚矣歲月幾何是非大定流芳遺臭兩俱亡窮吐彼堯渠埋骨茲土樵蘇尤唾而弗顧而過公之墓者莫不裴回太息想像其遺風是

果孰為榮辱耶嗟夫天不使公還葬河間而葬於此又不使蔡斃於異邦而斃於此其殆欲一正一邪昭然並列為世之法戒乎雖然使君之言行則王室不至於中微蔡氏亦免於誅僂是公之論蔡也不特忠於蔡氏而蔡之害公也不惟禍國祇以自禍也歟敬仰之餘併陳梗槩公之英烈尚聞斯言

祭忠節廟文

忠節有廟自太守朱公始然公之既請於朝也命未頒

而遽去其後牧臣鮮或加意故祠室之立苟簡為甚而  
其從祀之位次亦有可議者焉某蒙恩此來首修謁款  
裴回顧省慨然久之謀諸同僚遂徙斯宇庀工命役煥  
然一新或出或升惟義之比至於近世將臣捐軀犯難  
之死弗顧者皆附而祀之下至戎行亦許綴食嗚呼是  
足以彰朝廷表勵之美而成朱公建白之本志矣像設  
告成肆陳薄奠英威未泯其鑒此誠

祭王侍郎母夫人

嗚呼夫人其古之賢母歟方來嬪德門之初宗伯之年  
未冠也保惠之至其猶護驪龍之珠鞠育之切又如字  
丹穴之雛然能養而不能教者母道之常也而夫人獨  
知徙隣之深意欲勉經訓之苗畬廼睠岳麓羣英所廬  
前則有五峯之遺風後則有南軒之宏模顧謂嗣賢汝  
游汝居挹靈峯千仞之秀以助汝胷中之竒偉吸長江  
萬里之澗以滋汝筆端之芬腴豈晨昏之弗懷蓋深惜  
於居諸然其始也或以為迂其子若於慈為未足迨乎

上天延之大對魁薄海之羣儒厥聲赫然如霆之迅如  
日之起然後知為教子之力蓋於慈而有餘嗚呼夫人  
其古之賢母歟方蘭陔之娛侍極綵服之驩愉謂者齡  
之未艾奄長夜其云徂某也從宗伯游獲聞懿範之一  
二欲揚厲鋪張以待後世之大筆之椽如噫嗟兮今晨  
翬稱兮在塗朔風凜兮號空嚴霜慘兮冽膚悵莫留於  
仙馭徒泣餞於輓車

祭趙侍郎文



嗚呼我公遽止斯邪始疑弗信今果然耶維暮之春拜  
公于都樽酒笑談神閑氣舒退語於人公壯且碩謂當  
百年為國柱石越夏四月告別于公公時孔安有暍其  
容居亡幾何郵命相踵乃尹神臯乃正法從喜而不寐  
泚筆作書書在於涂而公歸歟時止時行孰非天命謂  
公安之不以為病御書親賜訊公安否將命東歸迺以  
疾告維公德人勿藥以瘳川逝颺馳奄其弗留位非不  
崇志則未究命非不通年則弗壽開闔抑揚果誰為

之茫茫太空孰其問之嗚呼茲歲老成殄瘁梅巖云亡  
公亦隨逝鄉之學者其將誰師鄉之仕者其將疇依矧  
惟鯢生最辱知己別去幾時遽隔生死冥冥長夜公  
今何之乘雲往來與汗漫期鈞天清都公樂無苦唯在  
人情寧免嗟慕墮涕如泉莫將我悲不忘者存尚或鑒  
之

祭詹大卿文

嗚呼天乎予公以卓異之材而位不究其用賦公以醇

明之德而生不假之年方疆場多虞宵旰太息之日而  
奪此老成之彥經濟之賢詩所謂人之云亡邦國殄瘁  
者也有志之士所以盡然而傷痛拊膺而問天蓋公之  
為人得諸天者既異而充之以學又深造其淵源自羣  
經百氏閎深奧衍之旨靡不心融而神會下至陰陽卜  
筮幽微幻渺往往探頤而忘筌惟其所造者高明自養  
者剛大故雖踐歷清華不以為泰屏居林泉不以為辱  
更榮悴而無二色禍福不為之遷改迨公道開明善類

登進乃復分太守之符持王人之節識者知公之將用  
莫不訢然而相賀奈何人事之非兮闕驛朝而馳訃音  
莫傳豈民之無祿不獲被公之澤乎抑厭世之溷濁寧  
輕舉而高騫公於幽冥之故死生之說既灼然昭融而  
洞徹宜其臨絕之音琅然不亂啓手足而全嗟吾鄉邦  
人物之盛蓋自昔而蟬聯比以來諸老淪謝惟公僅存  
若靈光之歸然後生小子尚得窺儀刑而興起奉教訓  
而周旋若某之不才顧何足以語上而公獨以為可教

每更以留連憶初筮之別公欲臨分之贈言曰盡心則無愧平心則不偏蓋拳拳服膺不敢失墜者五年於此若几杖而韋弦謂公年未衰尚克拜於堂巋冀鄙吝之獲鋤甚沉疴之待痊孰謂公奄然而逝乎曾不及乎華顛想音容其若存冀親炙而無緣悼前志之不修涕泣下而淪漣繼自今其何如惟砥礪而稱堅誓名節之不渝以報公於九原

祭陳北山文

嗚呼維公世之偉人有德有才有武有文閩洛之緒弗  
絕如綫巍巍紫陽是續是演靜涵一本動貫萬微隱顯  
相因體用弗離公游其門見謂巨擘溯流窮源研幾探  
頤蘊而蓄之既粹以精發而舒之亦大以宏非如世儒  
沉溺訓詁非如詞人聯緝毫縷平居穆然色下言徐遇  
事剗然氣陵萬夫破賊東堆震霆電激袖手北山窈若  
深嘿能開能闔可縮可伸嗚呼維公舉世孰倫經濟之  
謨戡定之畧愾塞通施遁藏自樂思豪力雄坐涌厥辭

駕風奔雲而與並馳尊俎春容淋漓筆墨踞視冰澌為  
我僕役先天之秘人所莫闕公獨玩心皇羲是師間者  
書來辱以告我誰歟共談緊子其可千里相望數遺以  
詩學失傳訛形於嘆咨觀公之志勇於任道將扶微言  
俾後有考我云斯文寄實在公紫陽之志盍成厥終云  
胡弗淑奄忽長逝朔風怒兮助我悲涕幸而有子公為  
不忘靈兮來思舉我一觴

祭趙提舉文

嗚呼維我聖朝天枝蕃衍號為磐石之宗三百年間英  
材輩出然德著於家者未有如篤行之行功施於國者  
未有如忠定之忠蓋父子相承世濟厥美事親盡孝則  
庶幾乎曾子事君盡道則無慙乎周公惟其純誠大節  
昭格於上帝故賜以峻明哲艾之嗣軼高陽之八龍公  
之稟於天者既挺然其特異而自少暨長沈涵漸漬不  
離典訓之中凡師門之指授與家塾之磨礪義利取舍  
之端必致嚴於決擇古今成敗之變亦洞究其初終故




材之成者日楸而誠之邃者彌充節麾累持宗盟載泣  
介潔自將則冰壺秋月之瑩剛果立斷則太阿龍泉之  
鋒踔繁姦彊凜乎其霜肅惠鮮惇獨熙然其春融雖憤  
世疾邪常若過於激烈而尊賢友善則未始不極其溫  
恭凡聲猷之可紀皆學問之餘功環轍雖頻不自悼其  
鬱握蘭雖寵不自賀其逢惟及物之是期曾靡計乎卑  
崇早掛冠於神虎獨抗志於冥鴻有冕山兮我我有聲  
湖兮溶溶將卒歲以優游遽罹於鞠凶嗚呼哀哉我昔

與公襟期實同辱媯盟之我締永世好於無窮聞拂衣而邁返思命駕以相從未巾車於北道已洒涕於西風今公之葬莫能躬絮酒之奠徒目斷乎層空想英靈之不泯冀胥蠻之潛通

祭左翼軍吳將文

嗚呼汝之年垂老矣討賊之役主將不欲汝而汝請行忠也同列具旺以一舟而當賊五舟也人不援而汝獨援之義也旺獲全而汝死豈不哀哉然人誰不死汝之

死以忠義可謂得其所矣渠魁不日就擒當令剗肝以祭汝官汝之子卹汝之家而廟於海瀕以祀汝忠死之士皆從享焉汝雖云亡必能為厲以擊賊也



西山文集卷五十五